

ces paroles grauées dans mon cœur depuis la mort de mon fils, i'espere que ie le verray bien-toft: car en verité il croyoit fortement en Dieu. Elle se confessa & reçut le Viatique dans vn grand oppressement de poitrine. Ce qui n'empeschoit pas de dire de fois à autre IESVS ma regle & mon Capitaine, ie croy en vostre parole: vous estes dās mon [27] cœur, quoy que vous ne paroissiez pas, ie le croy, ouÿ en verité, ie le croy: determinez de moy comme il vous plaira, ie vous verray, ie vous verray. Estant reconduite en sa Cabane, le Pere luy porta quelque temps apres l'Extreme-Onction, elle ne donna iamais aucun indice ny de tristesse ny de crainte, vous eussiez dit qu'elle estoit aßeurée du lieu où elle alloit. En effet si nous procedons avec amour & avec simplicité deuant Dieu, nous passerons de la mort à la vie comme on passe de l'Hyuer dans le Printemps.

Vn bon Chrestien la voyant fort oppressée luy dit, Charité, c'est ainsi qu'elle se nommoit, ne t'afflige point, i'ay toufjours eu cette pensée de toy que tu croyois fortement en Dieu, si cela est ne t'attriste point: car tu iras bien-toft au Ciel, fois constante en la Foy iusques au dernier soupir. Mi entian, respondit-elle, Ka nont niteponetauzin. Je suis dans cette disposition, ie ne croiray plus à demy, ie croy tout de bon: c'est pourquoy ie ne suis point triste, ie m'en vay au Ciel, ie le croy, elle mourut dans cette ferueur.

Quelqu'un des Peres ayant rencontré vne femme qui portoit du bois à vn malade, [28] luy dit apres auoir loué sa charité, quand vous faites quelque bonne action enuers vostre prochain, il faut que vous disiez en vostre cœur, ie m'en vay porter du bois à mon Sauueur IESVS. Je m'en vay faire du feu, ie